

四庫全書

集部

欽定四庫全書

集部

圭齋文集

目錄
卷三

詳校官中書臣呂光復

侍讀臣孫球覆勘

總校官進士臣繆琪

校對官中書臣范鏊

謄錄監生臣桑英

欽定四庫全書

集部五

圭齋集

別集類四元

提要

臣等謹按圭齋集十五卷元歐陽元撰元有
拯荒事畧已著錄元早以文名平生三任成
均兩為祭酒六入翰林三拜承旨凡朝廷高
文典冊多出於其手揭傒斯作元集序稱有
曰詩流者三卷曰鉉中者十卷曰驅烟者十

五卷曰強學者十卷曰述直者三卷其門人
王師模所編明宋濂序則謂原集一百餘冊
皆燬於兵惟存辛卯至丁酉七年之作二十
四卷其孫祐持編錄之此本詩賦四卷文十
一卷附錄一卷題宗孫銘鏞編集又非祐持
之舊矣孔齊至正直記曰歐陽元作文必詢
其實事而書未嘗代世俗誇誕時人謂文法
不及虞集揭傒斯黃潛而事實不妄則過之

然宋濂稱其文如雷電恍惚雨雹交下可怖
可愕及乎雲散雨止長空萬里一碧如洗實
亦未減于三人也虞集道園學古錄有送元
謁告還瀏陽詩曰憶昔先君早識賢手封製
作動成編交游有道真三益翰墨同朝又十
年蓋集父教授于潭州見元文大驚手封一
帙寄集曰他日當與汝並駕齊驅故集詩云
然然則元發軔之初聲價已與集相亞矣乾

隆四十三年五月恭校上

總纂官

臣

紀昀

臣

陸錫熊

臣

孫士毅

臣

陸費墀

臣

陸費墀

臣

陸費墀

總校官

臣

陸費墀

臣

陸費墀

臣

陸費墀

臣

陸費墀

臣

欽定四庫全書

集部五

圭齋文集目錄

別集類四
元

卷一

賦

頌

卷二

五言古詩

七言律詩



排律

卷三

七言絕句

卷四

歌

雜體

卷五

記

卷六

記

卷七

序

卷八

序

卷九

神道碑

碑文

卷十

墓碑銘

卷十一

阡表

哀詞

卷十二

經疑

書義

策

卷十三

詔

表

冊文

銘

說

卷十四

題

跋

卷十五

贊

疏

書

啟

祝告文

卷十六

附錄

欽定四庫全書



目錄

歐陽公文集原序

文辭與政化相為流通上而朝廷下而臣庶皆資之以
達務是故祭饗郊廟則有祠祝播告寰宇則有詔令胙
土分茅則有冊命陳師鞠旅則有誓戒諫諍陳情則有
章疏紀功耀德則有銘頌吟詠鼓舞則有詩騷所以著
其典章之懿叙其聲名之實制其事為之變發其性情
之正闡闢化原推拓政本盖有不疾而速不行而至者
矣然必生於光嶽氣完之時通乎天人精微之蘊窮乎

歷代盛衰之故洞乎萬物榮悴之情覈乎鬼神幽明之
蹟貫乎華夷離合之由舉其大也則極乎天地語其小
也則入夫芒秒而後聚其精魄形諸篇翰渢渢乎泱泱
乎誠不可尚已世有與於斯者其惟大司徒楚國歐陽
文公乎公諱玄字原功潭之瀏陽人其先家廬陵與文
忠公修同出於安福令萬之後公幼岐嶷十歲能屬文
逮弱冠下帷數年人莫見其面經史百家靡不研究伊
洛諸儒源委尤為淹貫遂擢延祐乙卯進士第歷官四

十餘年在朝之日殆四之三三任成均而兩為祭酒六
入翰林而三拜承旨蓋當四海混一之時文物方盛纂
修實錄大典三史皆大制作兩知貢舉及讀卷官凡宗
廟朝廷雄文大冊頒示萬方制詔多出公手金縢上尊
之賜幾無虛歲海內名山大川釋老之宮王公墓隧之
碑得公文辭以為榮片言隻字流傳人間咸知寶愛文
學德行卓然名世羽儀斯文黼黻治具公之功為最多
君子評公之文意雄而辭贍如黑雲四興雷電恍惚而

雨雹颯然交下可怖可愕及其雲散雨止長空萬里一
碧如洗可謂奇偉不凡者矣非見道篤而擇理精其能
致然乎嗚呼自宋迨元三四百年之間文忠公以斯道
倡之於其先天下學士翕然而宗之今我文公復倡之
於其後天下學士復翕然而宗之雙壁相望照耀兩間
何歐陽氏一宗之多賢也不亦盛哉初虞文靖公集助
教成均其父井齋先生汲方教授于潭見公文大驚手
封一帙寄文靖謂公他日必與之並駕齊驅由是文靖

薦公升朝聲譽赫赫然相埒卒符於井齋之言文靖之
文已盛行公薨二十四年其孫佑持持公集二十四卷
來謂濂曰先文公之文自擢第以來多至一百餘冊藏
于瀏陽里第皆燬于兵此則在燕所錄自辛卯至丁酉
七年之間作爾間有見於金石者隨附入之子幸為文
叙之以傳濂也不敏自卅角時即知誦公之文屢欲裹
糧相從而不可得公嘗見濂所著潛溪集不賜鄙夷輒
冠以雄文所以期待者甚至第以志念荒落學識迂疎

不足副公之望況敢冒昧而序其文哉雖然公文之在
霄壤中上則為德星為慶雲下則為朱草為醴泉光景
常新而精神無虧亘萬古猶一日序之與否尚何暇論
哉佑持字公輔問學精該論議英發無愧於家學者也
金華宋濂撰

歐陽先生集序

歐陽先生集曰詩流者三卷曰鈇中者十卷曰驅煙者十五卷曰強學者十卷曰述直者三卷曰脞語者三卷其門人王師模所輯也所輯者止此作而未已者不止此先生於書無不讀其為文豐蔚而不繁精密而不晦者有典有則可諷可誦無南方啁哳之音無朔土暴悍之氣惜棄在草野不得與典謨訓誥之述作以黼黻皇度然文關於世教斯可傳矣不繫其人之隱顯學貴於

知道知道斯可法矣不繫其書之繁浩先生之可傳可
法者固有在矣余獨恨不登先生之堂從諸生之後而
請益焉因王君請為集叙姑書以識予嚮慕之意後至
元六年冬十有一月朔揭傒斯序

欽定四庫全書

圭齋文集卷一

元 歐陽玄 撰

賦

天馬賦

翳房星之委精鍾天馬之權奇澡神質於渥洼砥勁氣
於月氏貞非坤牝健本乾為上分扶輿之秀下孕蛇蟠
之聲風雲資其格力雨露澤其光儀膺廣鳳臆鬣秀龍
鬐首昂渴烏之勢影捷杜矢之馳於是陋駟駘之產邁

麒麟之姿駢六飛於廣漠舞九奏於希夷若乃朝刷崑崙夕秣玄圃駕緱笙之子晉道霞觴於王母風冉冉兮斯征靈續續兮來寧覽熙世之德輝屬萬物之欣覩願陪禁衛自獻西土乃命移中戒造父釋雲幕於金鞍暎爭尹於瓊戶出則鏘和驚駢輿組媚日馭之光華展天衢之步武然其氣質不可求之驪黃之餘其芻秣不可畀之阜樞之伍峙玉山之殖未足供其飮委金臺之貲未足議其估是知天馬固難得而不易畜也所以罕見

於盛時僅聞於前古時則有倣鄒枚請廣樂府而容或
難之曰時方歌鹿鳴之章子乃為天馬之賦得無馳駕
鼓車者寧不與此而迴殊也哉嗟夫寶不自貴以人而
貴物不自異以人而異方神駒絢綵於水涯固期駑劣
之同滯至其裂柝矢而庭實竟乃自齒於天駟信物美
而無所遺兮亦奇才之能自致負鹽車而上太行者慨
未遇夫伯樂伏皐櫪而志千里者又何慙乎老驥振長
鬣而一嘶兮冀識余之所意塲埃風而上征兮願借翠

金匱要略卷一
雲以為鞞隨飛龍而上下兮羗先路其焉避彼豈乘虛
而騰踏兮追雲逐電之可冀也庶幾求之玄黃之外兮
則亦駿骨之可市也

辟雍賦

皇風清寧人文盛開京師崇天下之本國學萃天下之
才粵若稽古爰自蒼姬始號辟雍昉歷代聲名之盛本
大射行禮之宮其規矧於文武其度講於周公節觀者
於四面壅流水以環中若乃道閭邃嚴義闢軒朗澄源

止而不泥文瀾溢而不蕩肉好適半如辟之象茲乃辟
雍之初所以名狀也或在靈臺或在鎬京靈臺者為文
王所建鎬京者為武王所營茲乃辟雍之初非一地而
同一名也或習射兮觀德或養老兮興孝滙九有之俊
髦軌萬方之則效茲乃辟雍之初非一事而同一教也
迹其建侯設醵矩矱圓冠褰尺講事君之敬剡注視立
己之端斯則辟雍之習射天下之盛觀鮐背鶴髮尊傳
隆師祝噎以膳授几以咨斯則辟雍之養老天下之盛

儀闔閭啾啾泮奐夷猶覽上國之光華踵賢關之雋游
斯則辟雍之養士天下之名流有客聞之曰子於成周
之制講之詳矣於異代亦有所徵乎泝觀炎劉治盛中
世臨雍再拜化及四裔要荒萬里就學遣質鼓篋圜橋
以億萬計于斯時也辟雍亦可謂盛矣愚曰未然子徒
慕先漢之遺風若未覩今日之文治我國家聲教之所
暨也東踰若木之日津西探崦嵫之月竈南窮火維之
陬北際氷天之溼文軌之治既同弦誦之風四被視震

海為一辟雍陶同字為一庠序於是在天則應璧府圖書之祥在地則產孔廟金芝之瑞藏曲阜之特祠實飛龍之首歲乃擇成均之師申冑監之制三年而科詔頒文治燭日星乎曠世之條風霆乎多士之氣將見自今以始彼漢之億萬尚敢與今日同年而語哉大抵惟聖人能盡君師之職惟吾道能並天地而存惟養賢為顯俊尊帝之大務惟建學為化民成俗之大原矚此辟雍屹乎本根固願為今日之賦者續古之頌被之和聲叶

之永言前以光八百年之成周後以開萬億載之皇元

義門賦并序

宣文閣授經郎鄭君浚常以其家乘示余曰浦江鄭氏
義門文錄歷覽諸作蓋彬彬焉他日謁予一言為作義
門賦辭曰

翳伯僞之裔孫兮紛振振其好修承世微之蟬嫣兮寧
隱耀而發幽循義路以允蹈兮擇仁里而相攸被芳潔
以為服兮襲溫良以為裘將孝弟以為車兮方敬讓以

為舟歷九世而共爨兮壹乃心之休休曰五倫之於日用兮實有生之大猷父慈愛之恂恂兮子色養之油油若君臣朋友之際兮必忠信之與謀於睦婣其有惠兮在任卹其有朋閭儀雍雍以賓退兮家政凜凜其陽秋長者施其令則兮少者孝乎順柔珪赴弟以歿死兮綺代親而自囚史何感乎緹縈兮詩何嘆乎原隰之裒嗟高風之卓絕兮履艱貞乎何尤爰孜孜於稽古兮悉聖訓之是蒐陳時祀之秩秩兮戴首弁之俅俅述五禮以

為儀兮樂至和而不流以予觀於往昔兮將公藝之可
儔我歐公之史五季兮書旌表之法周門築壘以綽楔
兮柱雙立而烏頭雪霜貿貿於當世兮松栢岑蔚乎故
丘矧皇元巍巍乎有天下兮化丕冒於海陬敦懿行於
四國兮播令聞其若郵聞孫起家而交辟兮列相第之
前籌尋重席於官庠兮徹聲華於冕旒信積善之有報
兮密邇寵光之綢繆也

墨梅賦

伊江梅之受命泊與澹其相遭灼天地之太素亂水雲
兮齊高方三冬之搖落索群木於秋毫恍迴溪與轉嶺
發孤暎於蓬蒿枝苔封以瑩寒蘂玉切而華膏表萬有
以獨聖誰與子兮同袍何佳人兮黯然阻煙霧於林皋
豈皎潔之冒汙抑輝光之在韜彼翰墨之託寄亦何異
乎風騷撫尺素而太息心臨遠而忉忉何以慰兮空谷
瀉樽中之濁醪感外物之變化謹內志之持操物交物
以不染我與我而焉勞世不辨兮奚尤已或戾兮焉逃

與昭質之自虧從見笑於繁桃於茲花其何有懼天下之滔滔奚附意於守墨以傳誨於兒曹

頌

至正二年壬午七月十八日丁亥皇帝御慈仁殿拂郎國進天馬二十一日庚寅自龍光殿勅周郎貌以為圖二十三日壬辰以圖進翰林學士承旨庫庫傳旨命傒斯為之贊臣惟漢武帝發兵二十萬僅得大宛馬數匹今不煩一兵而

天馬至皆皇上文治之化所及臣雖駑劣敢不
拜手稽首而獻頌曰

天子仁聖萬國歸天馬來自西方西玄雲被身兩玉蹄
高踰五尺修倍之七渡海洋身若飛海若左右雷霆隨
天子曉御慈仁殿西風忽來天馬見龍首鳳臆目飛電
不用漢兵二十萬有德自歸四海羨天馬來時庶昇平
天子仁壽萬國清臣願作詩萬國聽

圭齋文集卷一

欽定四庫全書

圭齋文集卷二

元 歐陽玄 撰

五言古詩

舟次諸牖寄詩奉謝都水分監瑞卿監丞

抱疴辭承明買舟滬官牖祥襟正無悰蓬底可容納舳
艫尾相銜密次若鱗甲憶初離神京餘暑尚揮箒淹留
近秋杪朝爽欲添袂紆傳進元策走介奉一札使君適
分監羸縮制有法得書即欣然愛我踰素狎遣騶護輕

舟快若歷三峽鄉心鷹脫鞢野性兕出柙昔憂阻殽澠
今喜泛苔雪黃蘆間蒲稗綠藻唼鳬鳴舒懷對幽景寓
目成畫夾公堂為展席觴客禮意洽病予難却酒亦復
飲盈呷吁嗟逆旅途知已元不乏相期遠大器留詩當
盟軟感篆辭則長欲賦慚韻狹

送振先宗丈歸祖庭

并列小序于左

歐公孫子多擘派以為四暮年歸潁陰非無首丘志乞
洪不得請由是懈歸計攷公生平言亦頗憾先世先世

多才賢生適逢五季輻員政分裂盡瘁於所事竟乏垂
世名蓋亦限地勢况復公少孤坎壈蜀漢裔身當混一
秋代逢承平際擇里審所安實邇輦轂地子孫托畿內
宦轍亦云易人情曷免爾公豈溺聲利詎知汲簞移南
北尋睽異一枝先南邁司造有深意沙溪標德里瀧岡
重塋祭至今青原家十世祀不替振先吾宗英守正恥
骯骯閭閻保家法處約不少懟嘉樹無由枝嘉穀無穗
滯原本既不凡時需諒無棄矧今掄俊髦往往論根器

老夫辭冊府多病久憔悴徒懷薦士心言莫士軒輊賦
詩當推轂自愧辭已費憧憧青雲友誰如古人誼

歐陽公晚年乞守洪州累表不得請於是歸江右之
志遂不果余詩所謂其居偏方熟於歐文者能知之
蓋公之不歸廬陵其志深有可諒者矣南渡以後宋
人多議公此事洪景廬楊廷秀之賢亦未免有此意
甚者謂公子孫居穎為金人所戕而遂絕是大不然
近年奉詔修三史一日於翰林故府中攜金人遺書

得元遺山裕之手寫壬辰襍編一帙中言安平都尉
完顏色埒漢名鼎字國器嘗鎮商州偶搜伏於竹林
中得歐公子孫甚多以歐公之故并其族屬鄉里三
千餘人悉縱遣之則知未嘗殲于金兵也此好事者
為之辭明矣元遺山金士領袖生平極重歐公嘗有
詩云九原如可作吾願從歐陽北人至今佩服其言
振先歸以似鄉先生桂隱劉公一觀

為所性姪題小景

三首

林廬澹踈煙歸帆泊沙渚披圖得空闊總是經行處
寒屋茆簷古踈煙野樹春遙遙濟川者應是此中人
浦口歸帆落沙頭行客回林間酒旗出快著一篙來

東坡恠石

我懷赤壁仙此心已穿透憶曾據虎豹今與鶴俱瘦

七言律詩

大明殿早朝

扶搖萬里上青霄鳳闕龍池步步瑤駝背負琛金絡索

象身備駕玉逍遙衣冠俯伏傳呼嶽干羽低回看舞韶
湖海布衣瞻盛事他時田野夢天朝

試院倡和

仁皇下詔急求賢糠粃當時偶在前兩榜復科新大比
三人聯事舊同年關山道路尋常夢臺閣風雲尺五天
但使得材今勝昔吾儕寧復嘆華顛

張子能詩擅士林無時無地輒披尋文章咫尺不相見
春興幾多應自吟鍊字直疑成白首知音有待鑄黃金

何時尊酒論真訣要自康謠說到今

進講金華集衆賢禮闈叩命拜君前
花摧蠟炬全清夜餅餡紅綾憶昔年
龍尾步隨黃閣老鵠頭書下紫微天
南宮群彥時相問何似官街有米顛

至正羣興郡國賢威儀重見甲寅前
杏園花發當三月桂苑香銷又七年
豹隱山中文澤霧鵬搏海上翼垂天
明時禮樂須奇俊莫道儒生自聖顛

相臺

負郭東南裴相臺緣溪一徑踏蒼苔此日城闌少人到
當時公府棄官來禪床象屋留光雨書沼蛙聲噤鞠灰
泉石至今有貴烝山靈應解識三台

至正壬午十一月十三日祭初祖墓早仰更秘
書有佳句見勞匆匆奉酌嚴押

白髮甘泉叅從官歸來曳履上吟壇故山虎豹多文采
白水蛟螭有屈蟠謁客及門容履滿贅文盈篋借燈看
百年省墓償初志心憶先親痛苦剡

青春萬木一根荄一一春工妙剪裁顧我乞歸懷潁水
羨君訪隱到天台題橋肯學相如志誓墓慚無逸少才
但喜陽剛將景進明朝緹室動葭灰

至正壬午十一月十三日祭始遷祖墓于防里
村心是日春洲先生有古律四首紀其事玄用
韻奉答

道左遺墟三百載曾孫疊石作階基儒家冬至祭初祖
客子異鄉來遠支白髮始修桑梓敬青編久廢蓼莪詩

無由作吏守墳墓願訪故山耘紫芝

與公俱乏濟時具舊日相思不得過南國寄書川路永
西樓剪燭雨聲多池邊黃鵠有人賦門外驪駒先客歌
但得茆齋相伴處臨風遙想玉為珂

陶令歸來誰作室孟郊老去乏應門政緣踈懶動遐思
無奈過從求贈言平江曲澗助藍屋複嶺層巒如浩疊
歲晚胡為滯空谷萋萋芳草怨王孫

十年玉署絲綸手新把漁竿傍釣磯平生亦愛蒔蘭蕙

歸日惟知求巖薇
干祿郎君離綵侍
投閑老子賦緇衣
山中薦士書長寫
弱翰猶能為客揮

送白芒李宜忠之寧州教授

廣文家住白芒原
唐世忠臣閥閱存
寧郡喜迎新博士
邦人特重舊王孫
楊花絳帳春雲陣
苔蘚丹書暮雨痕
向使汾陽晞暖在
應慚詩禮在名門

竹澗圖

青林翠巘俯江郊
谷口湍流巨石均
憂玉萬竿鳴水樂

垂紳雙瀑盪雲旃風漪靜浸蒼龍影月瀨先搖紫鳳巢
歌罷商巖採芝曲兩翁翰墨定神交

敗筆

秋拈秃筆似愚慵曾為雲煙掃墨松脫穎荒涼空憶免
舊腰消瘦久如蜂小臣奏事冠初免敗將摩旗甲不重
老矣此心無可用少年豪氣為誰雄

郊天禮成應制

紫壇黃幄夜無風牲璧初陳月正中瑞靄霏微成五色

神光烜赫映重瞳千官屏息瞻天表萬國關心在聖躬
清曉慶雲高捧日簫韶前導駕還宮

謝恩日呈同年

把劍風簷日欲曛偶從甲舍得高文煙雲過目猶能記
花柳逢春各自欣奇字擬從楊執戟俊才端屬鮑參軍
客來為我傳新作筆硯無忘舊榮勲

比干墓

獨夫臺上醉紅裙七竅丹心豈忍聞白日已隨流水沒

青山猶護太師墳，忠肝一片埋秋草。
直氣千年起暮雲，我亦停驂薦蘋藻。
太行落木正紛紛。

接花木

園丁妙手即花神，換葉移枝偽脫真。
刀剪豈能傷化力，色香無復記前身。
春深自有鸞膠續，歲久行看鶴膝伸。
堪笑微生亦如此，牛為馬後呂為秦。

壺清

朝飲層冰淪性靈，夕飡秋露引修齡。
江湖大瓠中無物，

海嶠方壺外有情貌示神巫機闔醉邀市掾酒芳馨
何人欲作先生傳長憶寒蓂月滿庭

過洞庭 二首

白沙隱隱見金鰲殿閣憑虛結構牢天水渾融浮大極
神人幽顯隔秋毫龍堂深閼靈栖冷象緯低垂客枕高
欲作廟堂迎送曲杜蘅碧盡離騷

媧皇搏土擲虛空屹立君山面勢雄一畫犧圖天地骨
九江鯨觀鬼神功裾飄帝子蒼茫外樂奏鈞天頤洞中

頗幸當年鄒魯客觀瀾未到楚諸熊

侍宴北省

臣本江南一布衣恩榮今日及寒微
台繹列宿光相射湛露迎陽晝未晞
仙醞飲來生羽翼宮花留得奉庭闈
酒闌車馬如流水回望紅雲遠闕飛

孫春洲壽慶堂

孫母歐陽九袞登外家譜諫自廬陵
高年備養人俱羨同姓升堂我未能
好客郎君深巷輟讀書稚子小窓燈

朝廷屢賜尚方帛更待迴鸞織誥綾

寄有壬許叅政

京華白髮染塵埃喜見文場閉復開
自是曹叅當繼相不然王式肯輕來
上躬藻火慙無補衆口鹽梅屬有材
素志已酬歸欲早相期濁酒坐莓苔

澧州謝家建通濟橋

慶雲籠日護雲根玉樹薰鄉接澧沅
太傅功留名伯埭相君心競謝公墩
已誇蟬蛸綿今古猶羨封胡偉弟昆

珍重盧溝溝上月隨時車馬勞于門

夜宿寺前農家

漢南旅店已星稀倦宿田家帶落暉
蕭寺依山聊復爾
鄴侯送酒是耶非風餐并覺涼生飯
露坐俄驚月在衣
老子漫遊吾漫送登山臨水澹忘歸

西明道人

武昌堤上水雲身三十年來識道人
只為漫遊相見少
故知臨別贈言頻
憧憧車馬紅塵老靡靡江山白髮新

邂逅一回詩一首錦囊千首未為貧

瀏江

瀏江江水色幽幽兩岸青山雲木稠
一自桑欽載源委曾留孫盛作春秋
猿岫風來起波浪龍湫月出見汀洲
下流兩度翠華過光氣至今浮斗牛

昌山

昌山峽口日西斜蘭渚維舟近酒家
水漱樹根龍露爪石排江岼虎交牙
路迴佛寺藏深塢風動漁舟掃落花

再拜靈均獻蘋藻月明環珮下汀沙

讀銚養吾虞青城書

季子胡為葬羸博太公復欲返營邱
匆匆塵事半萍梗
往往異土迷松楸誰能樊澤為表識
賴有杜羔勤訪求
但當作吏守墳宅莫待暮年思遠遊

早飲聽秋居士園池

碧池流水綠潺潺高下樓臺紫翠間
阮籍才華勝南族
謝安清致滿東山標名花塢鶯爭道
集句桃符鹿守關

灑掃園丁今白髮秋翁化鶴幾時還

錙草亭詩家

朝廷采詩廢已久公卿薦士亦罕聞坐令劉氏伯倫鍾
生作唐人賈島墳光如黃壤翳明月副在青山藏白雲
米家骨朽怪事息又見廬陵老隱君

排律

賜經筵官酒次蘇伯修韻

鼇極天初補娥池月已修鮮飈生廣厦清旭暎垂旒三

漏聽無壅黃瞳視不流凝神思燕翼虛已納鴻猷章撤
金爐炮筵收玉笋浮甘泉歸步遠太液便程優鸚鵡棲
宮樹鵲避容舟商者羨漢幣瀛僞膳唐羞名輩應相
語明時豈易醅徘徊西掖晚鴈影度延秋

謝德盛奉諉堂

種得忘憂草毋安憂可忘葉滋金水潤花帶石雲香淑
景盈東閣春暉盎北堂靈苗仁壽域晚節治平鄉世澤
深培植先聲續顯揚才華昌後裔事業富孤孀沃壤根

株茂慈聞髮髮蒼詠歌傳翰苑雨露溢恩光

圭齋文集卷二

欽定四庫全書

圭齋文集卷三

元 歐陽玄 撰

七言絕句

喜門生中狀元

泰定丁卯八月十二日崇天門傳臚賜進士
右榜第一人阿恰齊左榜第一人李黼皆肄
業國學日新齋余西廳授業生也是日京尹
備鼓樂旗幟麾蓋甚都導二狀元入學謝師

拜余明倫堂榜眼銘思誠探花郎徐容嘗因
同年黃晉卿彭幼元從予遊亦拜其側其餘
進士以門生禮來拜謝雜還不記姓名園橋
門而觀者萬計都人以為斯文盛事昔未有
也同寅舉酒相屬偶成四絕以紀其事

昔被仁皇雨露恩三朝五度策臨軒小臣報國無他伎
館下新添兩狀元

禁院層層桃李開天街繡轂轉晴雷銀袍飛蓋人爭看

兩兩龍頭入學來

淡墨題名二十年一官獨自擁寒氈居然國子先生館
三五魁躔拜座前

都人舉手賀昇平不羨黃金遺子籛進士從今成典故
唱名纔罷拜先生

出試院有作寄諸弟

天厯庚午會試院中馬伯庸尚書楊廷鎮司業及
玄皆乙卯榜進士偶成絕句紀其事出院明日有

敕督修經世大典又成小詩寄諸弟

省垣東畔至公堂十五年前戰藝場飽食大官無補報
兩科來此校文章

御史承差鎖院門侍臣傳詔出天閣試官被命聯鑣至
同榜三人出謝恩

長樂鍾鳴拆號時三台八座列參差自憐手把天瓢水
一滴鄉關不得私

聖主宮中遊幸疎日臨祕閣玩芸儲昨朝蘭省纔開試

清曉玉音催著書

別駕祠前雪水渾
弟兄沙上舉離樽
三年不洗來時褐
要看淋漓別酒痕

薊門城頭過階塔
一一行人通竇間
今朝送客又還入
那忍更投名利閑

香山山頭新月彎
一似家里看西山
去家五十度強望
圓壁何時照我還

仁廟初科射策郎
如今斑白玷朝行
東風昨夜聞歸鴈

夢繞江南烟水長

夜開金鑰詔詞臣對御抽毫草帝綸始信朝家重儒術
一時同榜拜三人

試院偶題贈巽齋

蓮燭通宵擬御題槐龍風急漏聲遲玉堂冷透青綾被
憶侶灤京五月時

小雨陰風夏夜闌穿窓撲面雪成團平明笑與長官說
天上玉京如此寒

聖德文明鼎運開相君承詔謹掄材誰言慶厯科無補
中有韓歐富范來

百鵠充庭氣若虹千鷺食葉響春空東風一夜吹噓力
明日紛紛綠又紅

鯤鵬一化徙天池白日青雲在頃時我以世科慚克紹
那能妬喘更笞兒

陳編屹屹老無聞寂寞箕裘幾許存方寸留耕猶有望
擬尋手澤訓諸孫

所貴姪梅

老樹縱橫出氣條一枝還又亞牆腰西湖湖上掀蓬看
一夜吹香滿六橋

為所性姪題小景

綠樹清江遶舍邊門前長泊往來船休官亦欲來林下
只恐人嗤我學仙

所性姪家藏東坡看竹圖

銀燭高烧照艷粧繁華過眼已相忘敲門自愛看修竹

未必殷勤為海棠

所性姪藏所翁全身戲珠龍

萬戶千門夜半雷
明朝日出五雲堆
老龍引領春消息
玩弄明珠未肯來

漫題四絕

鈴索無聲玉漏稀
青綾夜直月侵扉
五更一覺梅花夢
催得江南學士歸

屬官分住省郎曹
省樹年深過屋高
翰長晝閑來啜茗

下簾危坐聽松濤

鰲山六月少蚊蠅
四壁松風動畫繒
長貳聚廳清澈骨
一人人繫一銜冰

翰林老屋勢深雄
猶是金家元术宮
定鼎初年曾作省
至今門徑鳳池通

為琅溪題折枝海棠

點綴春風只一枝
此花猶是半開時
更令老杜如今見
便是無情也賦詩

萬竿煙雨圖

森森萬木種清和奈此霏微煙雨何千古首陽宗二墨
清風又侶不須多

墨竹

疎枝淡淡與濃濃垂葉應無霍靡容玉立滿身都是雨
何人能識葛陂龍

驢上曉寒圖

水聲山色畫屏中衛子凌兢兩袖風曾向天津橋上否

誰從驢背覓三公

灞橋風雪圖

漢樹秦雲一色黃
新詩拍塞小奚囊
藍關尚有潮陽債
不識先生有底忙

玉林琪樹路漫漫
驢上凌兢兩袖寒
一段乾坤清意思
又馭老子出長關

學士烹茶掃雪時
當時已被侍兒嗤
灞橋驢背何為者
直要衝寒去覓詩

驢上凌兢兩手龜南來客子為尋詩而今十倍瀘溝冷
偏許青雲熱士知

宣和梅雀

歲晚孤根獨發時飛飛凍雀苦相依鶯花世界春三月
會有名園照夕暉

題明皇葉法善一行禪師講經

廣陵玉笛夜何如明日宮中看佛書兩界山河當指似
盧龍塞上有龍豬

題顧子虎

松風謾謾茆葉低於菟
顧子行欲遲從今慎勿殘乳麋
心亦可學秦巴西

再題臨川別卷

西蜀橋邊薛校書
風流自是女相如
平生不受梅花聘
只為清才自有餘

三牛圖

兩豎騎牛過遠村
一童橫笛弄黃昏
老僧正解荊舒字

坐愛三牛了不犇

萬竹圖

露壓煙稍整復斜
有時風定翠交加
閒身幸老清平世
喜見鵲雛待竹花

宋徽宗菌圖

地上層雲起玉柯
依稀遺墨認宣和
莆陽相國君知否
好作齋房芝草歌

高宗御書

君王不受辟寒釵永巷泥金進損齋欲上大清樓下石
啼鴉落日滿宮槐

陳搏睡圖

陳橋一夜柘袍黃天下都無鼾睡床贏得墜驢閑老子
為君眠斷白雲鄉

雪夜訪戴圖

雪夜操舟童僕勞偶然歸去便稱豪若為返棹成佳趣
轉憶當時不出高

吳西村雪霽圖

鄭虔能畫又能詩
獨立經營雪霽時
曾向湘江挈釣艇
賣鮮沽酒鬚如絲

老蒲萄

半蝕秋虫老葉皺
祖藤孫蔓淡濃勻
何人偶值髯君睡
奪得驪珠足眩人

蒲萄

院落陰陰一架秋
新鴻聲裏月如鉤
老龍偃蹇垂無力

戲吐玄珠不肯收

子昂雪鵠

水晶宮裏文章伯
當世誰知翰墨名
賴有瀛洲光價在
不曾承詔寫鵠鵲

墨荔枝

向來千里騎塵紅
生色羅襦濕翠濃
顏色似嫌妃子浣
蕭然猶有墨君風

錙山立梅圖

山澤癯儒面目真見梅往往見先人屋梁月色新
湔拂茅舍玉堂同一春

天師月梅圖

隴頭誰寄一枝來多謝天公巧剪裁
猶自壽陽粧額後到今玉蕊忍全開

寒雀梅

斗柄初開第一枝遊蜂寒雀已先知
相逢不忍輕飛去直與梅花了歲時

榮碧潭全身龍

巨壑深溪萬水深
四時濃黛浸千峰
天衢邂逅全身露
還信碧潭盤老龍

榮朝瑞正面龍

天光烜赫五雲間
千仞丹梯不可攀
鰲禁侍臣今白首
幾回正面見龍顏

榮建翁家藏陳所翁龍

畫龍居士舊憑熊
能寫青雲隱見蹤
阿堵神光留意處

肯教飛去葉公龍

壽卿龍頭

聖朝龍首六七輩總是知心識面人
我亦待渠頭角老不知誰命繪麒麟

吾友龍頭

少年不學躍天衢便被良工寫入圖
老去全身何所隱會當謁帝乞江湖

閒展山水手卷

十年京國看圖畫半幅雲煙亦惱懷今日身行屏障裏
却思移住最高峯

又

動靜之間毫髮微要於微處動天機此中消息君知否
玉琯葭灰夜半飛

醉翁亭障

為南翁作

長史琵琶皮作弦使君眉宇飲中仙
滁山滁水渾堪畫獨有風流意不傳

武三思雙陸

上陽無子局方闌又到乘龍第一盤
餅餽未來聊樂耳
郎君好好點籌看

贈翠壁垺講主

上人官寺講華嚴聞說心華日日添
晚歲結茅依翠壁
龍嵐虎氣滿晴簷

贈彭漢節

君家已有笏堆床
惟勿筌蹄書傳香
昨宿山堂中夜起

金匱要略卷三
西窓燈火誦琅琅

贈彭雲溪真

少年書劍出鄉關
晚歲雙旌五馬還
辛苦一生清白吏
祇留松菊應蒼顏

過高郵

高郵海上水雲空
曾說明珠夜吐虹
底事年來光恠息
阿誰身到廣寒宮

題永清觀天瀾

黃木扶胥日出時
泊天波浪渺無涯
濁河上接銀灣處
只許乘槎博望知

題栢庭和尚

香葉曾經宿鳳鸞
苦心容蟻量應難
明堂自有擎天柱
且喜山中耐歲寒

偶題

溪水清漣樹老蒼
行穿溪樹踏春陽
溪深樹密無人到
時有幽花度水香

寄山村兄

季子京塵滿黑貂兄年九袞髭蕭蕭何時約我山村路
傍柳隨花過野橋

贈歐陽震遠

震驚百里未為遙巖谷回春只一朝要見禹門頭角異
乘時一躍上青霄

京城雜詠

玉堂集日列金羈學士新兼祭酒時五百書生簽講遍

八甌花影最來遲

麗正門當千步街九重深處五雲開
雞人三唱萬官集應制須迎學士來

白玉堂前夜合花高高綠樹散朱霞
朝來如見唐人畫繫着誰家白鼻騮

龍笙鳳管舞輕盈步障遊看花滿城
行到瓊林春更好新來進士唱名聲

鰲山宴罷月溶溶太液池邊湛露濃
不用金蓮送歸院

水晶宮出玉芙蓉

京城走馬聽晨鐘我欲宵征僕興慵却憶江南春睡美
小樓欹枕聽村春

奉詔修書白玉堂朝朝騎馬倚宮牆
河東畔垂楊柳時有鶯聲似故鄉

題永清寺白巖清暉方池古松四韻

上人燕坐白巖阿巖上皚皚白石多
曾到補陀南海岸
白花無數擁盤陀

巖前高閣扁清輝
碧瓦朱甍映翠微
老子懸車還故里
倚闌何日看雲飛

白巖山下俯清池
花有清香水有漪
幾度收經看月上
分明水底見摩尼

古寺長松倚半空
問渠年臘祖師同
應知方外輪囷器
多謝清時雨露功

題昭文攜琴圖

孺子攜琴未去弢
兩翁山水偶相遭
知音已置虧成外

到底昭文不鼓高

和寶雲長老澈一清二絕

禪板蒲團百念空坐聞宿鳥起霜風巡堂首坐三更過
師在雲山第幾峰

虎溪一笑欄珊了不似當時剡棹回高興莫教容易盡
青鞋布襪約重來

逢江易藝芳干賦芳洲

楊柳垂垂拂釣磯平沙雨過綠生衣王孫鬪草歸來晚

撲漉鶯鶯帶水飛

東山春景


春光澹澹日遲遲正是名園撲蝶時却憶小橋流水過
東山春色在桃枝

題蒲萄

宛馬西來貢帝鄉驪珠顆顆露凝光只今移植江南地
蔓引龍鬚百尺長

題分宜趙尹所藏子昂竹石圖

有客有客白其馬汶篁移植燕山下歲寒心事木石知
雨露恩深詎能寫



圭齋文集卷三

欽定四庫全書

集部
圭齋文集卷
五四

詳校官中書_臣呂光復

侍讀_臣孫球覆勘

總校官進士_臣繆琪

校對官中書_臣范鏊

謄錄監生_臣桑英

謄錄監生_臣王增賢

欽定四庫全書

圭齋文集卷四

元 歐陽玄 撰

歌

畊學問答

世間惟有畊與學思量二藝皆無錯畊者榮華得富豪
學者羽翼生鱗角畊問學得恁賢累年累月在窓前田
地拋荒園圃廢日間忘食夜忘眠學者答非容易筆頭
雖小驚天地但看王侯將相家盡是當年勤苦至學問

耕得恁苦渾身穢汚生泥土冬月之間被雪霜春天曉
暮遭風雨耕者答不辭辛鋤頭翻地出黃金但看世間
儲積者盡是當年勤苦人畊可憐學可愛思量二藝皆
懷大少年辛苦老來閑粉壁朱門多自在

題四時百子圖

藏蒙紙弊墨渝實圭齋親
筆近見他集亦有恐悞

天無一日具四時人無一母生百兒何人筆端巧造化
人事天時俱盡之三三兩兩如魚隊日長遊戲闌干外
采蓮攀柳爭後先繞竹觀梅分向背一真未鑿萬象春

誰家苑囿誰家人莫是越王泛螟嗣西湖湖上嬉芳塵
當時富貴傍觀羨至今宇宙流傳遍爭如茅屋浣花溪
竹根雉子無人見摩挲此圖真拊髀多憂正為多男子
但須得似仲謀兒人生一夔已足矣

題趙菊山文肅公閱武像

浚儀王孫宮錦袍紅鞵玉帶琕琕刀大夫在官盛冠佩
州將按旅陳旌旄汝陽眉宇照今古五陵志氣橫江濤
世皇大舉獵德網池上不遺丹鳳毛宮門承詔鑄銅馬

瀛洲接武乘金鰲駸駸亳社百年久奕奕燕臺千仞高
題山莊所藏東坡畫古木圖

眉山昔日生三蘇一山草木為之枯後來筆端挾春腴
却令生意回枯株樹經公筆無老醜天以春工付公手
誰云華行龍眠翁奚必法嗣洋州守山莊劉氏富清玩
家有蘇公舊揮翰恍驚濕蘚粘惟石慣見倒根生斷岸
涪翁對此煮春茶為公梢上掛長蛇燈窓細讀假山記
秀氣終屬眉山家

至正壬午十一月余以疾謁告南歸求壑至安
成郡北之族中節判繼先劉君相公不遠一舍
携尊俎見勞談邊得知為西皋趙學士之壻別
次為余徵詩即席走筆作長句併呈似王守筠
溪相公及郭倅明則相公一祭

德州沃野濟岱雄池產往往多明公與君初見問爵里
塵邊又復知冰翁冰翁西皋古君子擇壻如君信佳士
故應邂逅氣味同遠來勞我於桑梓南州初筮發新硯

安成名藩駕屏星金鑾學士已頭白玉潤郎君終眼青
我嘗三仕歷郡邑聽訟催科紛蜩集能令過客情誼洽
可見邦侯才力及古廳小飲亟分手因君索詩為君壽
郡中政清長貳和為我寄聲賢太守

贈趙祥表稍

浚儀公子令幾葉裝池裝潢以為業道傍蒼琅猶一惜
池底玄灰信多劫鋪張幸及時黼藻流落還同故書篋
魏武子孫曹霸馬唐家宗室滕王蝶淳化石本墨模糊

宣和印章紅摺疊魚鱗已是善排比驚尾猶况工剪貼
但持絕藝動縉紳勿向同儕論譜牒藝文舊監漸潦倒
翰墨當時勤涉獵心期知子價千金只恨無才寫蒲筵

詠春閨怨

東風園林花草香芳閨寂寞春晝長佳人獨守情默默
銀床錦被閑鴛鴦終朝倦繡拈針指怕向花前聽鶯語
喚回舊事千萬端杏臉蛾眉淚如雨玉郎去年辭家時
綠楊紅杏嬌春暉綠楊紅杏色如舊悵望玉郎猶未歸

一春魚雁音書絕雪膚消瘦千腸結斷腸猶立幾黃昏
那更青山苦啼鴉

項見同舍柯博士所贈趙孝子歌真佳作也客
以是卷繼求余言遂用柯韻作一首

利津城城上烏飛向城南叢塚呼塚前無人作寒食但
有被髮哀號孤行人厭烏見被髮憾欲射烏金僕姑靈
烏下告孤兒苦遠訪親骨踰重湖兒生四歲時父別阿
嬈去嬈老婦已孀養兒為兒娶兒思往從父念嬈共燥

濕令年令伯正陳情他日韓湘竟收骨江南五千里山
東二百州州州旅寓有南北爾父存亡何處求跣行及
河十趾血河風吹沙天慄烈遭逢執友向燕薊指示丘
墟瀕海碣身為衛子髮緹鞍忽墮地開親穴君不聞
饒娥江頭哭父屍浮龜魚孝子精神貫今古明神降鑒
寒空虛博士作歌傳里閭

和李溉之舞姬脫鞋吟

宮袍繡盛金花綺紅綃緊襯雙鸞尾盈盈漫服舞腰輕

綠雲飛處香風起藕絲掣斷春雲鬆瑞蓮雙結並頭紅
天天曲曲玉彎彎翠鳥飛去天欲軟玉階秀出蘭笋長
瓊砂迸出蘆芽淺徘徊困倚東風力濕砌香雲墜無跡
無限嬌羞不自持君王喚起扶花立

贈畫工黎仲瑾號碧山

吾聞長弘之忠裂金石精氣千年化為碧人生賴有方
寸妙萬變神奇從此出又聞西方梵僧名法能令兩
眼碧色晶瑩瑩有時肘後洒墨汁纖穠踈秀皆成形碧

山畫神欲入品表裏神光碧瞳炯浮嵐暖翠山不受盡
付晴窓落泓影碧山學士今為誰玉堂茆舍各有時煩
君添我山下屋更看白雲相陸離

題子美尋芳圖

吾年三歲聲吾伊慈親膝下教杜詩如今蟬蠹三十載
夢寐欲見終無期誰家山水空翠濕彷彿相逢拾遺揖
金馬門前封事稀碧鷄坊裏尋春急野桃官柳春連連
水流山店依平川眉尖不着杜鵑恨壺中風月開元天

君乘蹇驢步如棘後有騂騮追不得茅屋西風五百年
虛度人間幾春色

題紫微老人大字歌

紫微老人射生手挽強竟取黃金斗驃騎營中拜驍勇
鳳凰池上稱耆舊時平腕力無所施筋骨猶能學顏柳
縱橫戎畧結構體殺活兵機屈伸肘山莊劉氏得最多
當日襜褕駐應久高樓大扁曰明遠况有愛山并尚友
我來後公五十年主人酌我樓前酒平田野水鳬雁集

重岡複嶺蛟龍走登高欲賦乏佳興忽覩台躔照窓牖
家藏有此希世珍取酒當為主人壽想當洗硯殘筆時
羽管生風劍龍吼焉知令人正傳玩名與麒麟同不朽
嶠南魁臚十五秋老將如令安得有鄂公九原如可作
養壽清商為公奏

送劉子簡之武昌學正

劉侯兄弟競秀發仲氏卓犖殊可人訓徒名門示高爽
振臬中實皆輪囷未誇于氏容駟馬豈羨楊侯朱十輪

荆才非止箇簾櫺燕璞迭見玕琪珣伯留天庠不可去
仲始捧檄歸娛親滔滔南紀盛藩翰文武化行初未泯
世皇八駿所歷處危蹕至今疑有神盤中首蓂不在飽
座上芷蘭俱可紉吁嗟劉郎慎勿浪彈缺自古江漢無
窮鱗

送聶以道之官

天歷聖人在海南南省大臣理鹽筴聶君老儒幕下郎
日飲清水鬚髮白是時潛邸具知聞召見殷勤親賜食

明年翠華望北還復過湖南駐清蹕試舉郎君問宣聞
聞臣上前盛稱述省郎歲滿調江華回瞻馬首天南北
生平固自結主知下邑惟思躬吏責慈心懇惻撫惇嫠
宿蠹推求剔纖悉甘棠遺愛十二碑其中一碑磨崩劣
豪民斂水三百年力能挽注甦涸轍爾來公牒至京師
廟堂除吏餘八百重瞳覽奏記姓名呼之以字顧臣列
若云賈誼久不見猶喜真卿獨先識秉鈞數對此掄材
司讞無如武昌劇天顏沈思霽色回姑惟首肯心未擇

遠臣客舍擁敗氍誰知京兆牛衣泣青天晝有風雲嘒
猛虎寧蛟向山澤華萼樓頭賞鱗對臨苗門下分芋瑟
念昔部使舉政最往往當途多抹楅祗緣早忤耳目司
豈復虛蒙股肱力人生榮進自有期簡在淵衷非易得
小儒作歌屬山甫愛莫助之增太息

示姪

吾宗孫子多好學爭持卷軸求余詩嗟予膏馥有幾許
况復老懶惟其時子年弱冠氣方銳立志要與青雲期

冀馬生駒汗血器越女墮地瓊瑤姿固知美質故應爾
所貴論道隆師資牧之涉世晚自悞冬至作詩鐫阿宜
初陽萌動慎培養萬木一本含春滋

題曜海朝天龍

玄雲靈霸海波立神龍挺水超天潢畫師題筆睨八極
意與元氣爭毫芒玉京僊聖驂翱翔雜騎麒麟與鳳凰
龍拖雲氣歸洞府海日杲杲天中央

道吳山

金匱山志卷四
道吳山頭龍自卧疊嶂重崗深紫邏靈湫瀑布千丈長
古寺神杉十圍大崇祠坎坎風雨來樵徑丁丁鴻雁過
郡人夜望北斗魁下有突兀青蓮座

大圖山

大圖山高高幾許絕頂嵯峨戴林塢石間花開自夏春
地爐僧擁無寒暑清流白鵬滌毛距綠樹黃熊引筋脊
山腰日午嬰兒啼知有雷公出行雨

奉勅題明皇馬

明皇八駿爭馳道知是開元是天寶當時一顧傾國姿
萬里君王蜀中老奎章閣下文書靜袞衣高拱唐虞盛
此圖一出非偶然要與明時作龜鏡

雜體

鄴之垌古樂府

有序

至正壬午皇帝有勅賜故和寧忠憲王勲德
碑命翰林學士玄為文碑立鄴門近郊戴螭
履龜龜有異瑞首如繪足如玉搢紳賦詩紀

異立作鄴之垌一首

鄴之垌穹碑銘銘維何誅和寧維和寧勲揚庭臣立詞
帝者莽倖琢石石効靈靈何居偃句形顯之文旋滢滢
絡鼻口達厥顛足之哲色晶熒馬邾武驪腹駟嗟彼蔡
象應靈國守器列前廷王之忠格高冥珉之瑞天使令
發幽光炳丹青王有子承德馨決大疑陳大經疇五福
詒千齡作偃句寶龜名

漁家傲南詞

并序

余讀歐公李太尉席上作十二月漁家傲鼓
子詞王荊公亟稱賞之心服其盛麗生平思
彷彿一言不可得近年竊官於朝久客輦下
每欲倣此作十二闋以道京師兩城人物之
富四時節令之華他日歸農或可資閒暇也
至順壬申二月玄修大典既畢經營南歸屬
春雪連日無事出門晚寒附火私念及此夜
漏數刻腹藁具成枕上不寐稍諧叶之明日

筆之於簡雖乏工緻然數歲之中耳目之所
聞見情性之所感發者無不縻括槩見於斯
至於國家之典故乘輿之興居與夫盛代之
服食器用神京之風俗方言以及四方賓客
官遊之况味山林之士未嘗至京師者欲有
所考焉此亦可見其大畧矣

正月都城寒料峭除非上苑春光到元日班行相見了
朝回早闕前褰帕歡相抱漢女姝娥金搭腦國人姬侍

金貂帽綉轂雕鞍來往間
間馳驟拜年直過燒燈後
二月都城春動野引龍灰
向銀牀畫士女城西爭買
架看馳馬官家迎佛官蘭
若水暖天鵝紛欲下鷹房
奏獵催車駕却道海青逢
燕怕纔過社柳林飛放相
將罷

三月都城遊賞競宮牆
官柳青相暎十一門頭車
馬並清明近豪家寒具金
盤釘墻祭留連芳草逕歸
來風送梨花信向晚輕寒
添酒病春煙暝深深院落
秋千迴四月都城冰碗凍
含桃初薦瑛盤貢南寺新
開羅漢洞

伊蒲供楊花滿院鶯聲弄歲幸上京車駕動近臣準備
鑾輿從建德門前飛玉轡爭持送葡萄馬乳歸銀甕

五月都城猶衣袂端陽蒲酒新開鵬月傍西山青一搯
荷花夾西湖近歲過茗雲血色金羅輕汗揭宮中畫扇
傳油法雪腕綵絲紅玉甲添香鴨涼糕時候秋生榻

六月都城偏晝永輓轡聲動浮瓜井海上紅樓歌扇影
河朔飲碧蓮花肺槐芽潘綠髻親王初守省乘輿去後
嚴巡警太液池心波萬頃聞芳景掃宮人戶撈漁艇

七月都城爭乞巧荷花旖旎新棚簾龍袖嬌民兒女孩
偏相攪穿針月下濃粧佼碧玉蓮房和柄拗晡時飲酒
醒時卽淋罷麻稽秋雨飽新涼稍夜燈叫買雞頭炒
八月都城新過鴈西風偏解驚游官十載辭家衣線綻
清宵半家家擣練砧聲亂等待中秋明月翫客中只作
家中看秋草墻頭螢火爛踈鐘斷中心臺畔流河漢
九月都城秋日亢馬頭白露迎朝爽曾上西山觀蒼莽
川原廣千林紅葉同春賞一本黃花金十緡富家菊譜

籤銀榜龍虎臺前駝鼓響擎仙掌千官瓜菓迎鸞仗

十月都人家百蓄霜松雪韭冰蘆葍暖炕煤爐香豆熟
燐獐鹿高昌家賽羊頭福貂袖豹祛銀鼠褌美人來往
輓車續花戶油窓通曉旭回寒燠梅花一夜開金屋

十一月都人居暖閣吳中雪紙明如堊錦帳豪家深夜
酌金鷄喔東家撒雪西家噉纖指柔長宮線弱陽回九
九官冰鑿盡道今冬冰不薄都人樂官家喜愛新年朔
十二月都人供暖簾宮中障面霜風獵甲第藏鈎環侍

妾紅袖壓咲歌聲送金蕉葉倦客玉堂寒正怯曉洮金
井冰生鬢凍合竈瓢飭一椀吳霜鑷換年懶寫宜春帖

圭齋文集卷四